

[Prag], 6. Dezember 1579

Von Johannes Crato von Krafftheim

UB Erlangen, Briefslg. Trew, Crato, Johannes I., Nr. 1271.

S. Post varias errationes tandem ad me peruenit ea tua epistola, quam nescio quo Octobris die (dies enim non est ascripta) dederas. Quae de Maestlini calculo et Tychonis approbatione commemoras, eam exunte (!) Octobre (!) scriptam indicio sunt. Verum ut vt sit, me post tot annos literas à te accepisse, atque te viuere et valere laetor. Maestlini tabulas nullas vidi. Si Diaconi nomen prae se ferunt, ne eas huc mittat, et sacra infamet, oro. Sunt enim pessimi homines, qui se solos Relligiosos putant, in ea sententia, atque illud Principibus viris persuadent, quiduis aliud quam sacrarum literarum cognitionem, nostros Euangelicos rectius et diligentius curare, atque ex communibus formulis declamatire. Nolim hanc opinionem isto exemplo confirmari. Caeterum si tabulas Maestlini sunt publicas, ut earum exemplum ad me mittas, peto. Fortasse ei prodesse potero, modo prius quam ex aula discedam, accipiam. De Genesi filij securum te esse iubeo et omni cura libero. Vitae autem atque Historiae Ioach[imi] Camerarij viri opt[imi] et integerrimi dum nobiscum in his terris viueret, descriptionem, nullo modo, dum hanc seruitutem seruio, etiam ea liberatus in me, nisi Iurisiurandi religionem neglesisse (!) videri, et in me omnia aduersa commouere velim, recipere possum. Ille actus cum DIVO Maximil[iano] Imp[eratore] omnium praeclarissimus silentio praetereundus esset, vel fides violanda. Per quicquid igitur possum te oro; Cum Ioach[imus] vir summus et singularis, in te singulari animo fuerit, Cum tu excellentiam in Graeca lingua illius magis, quam vllus qui viuit videas, cum tibi bonitas naturae, vitae integritas, sapientia et vsus maximarum rerum huius viri, sint exploratissima, ut quod semel te facturum recepisti, perficias. Quam multis alijs rebus quae minus laudis et verè approbationis habuerunt, plus in hac vita temporis impendisti? Erunt fortasse qui calumnientur, verum ex horum vituperatione plus laudis feres quam mediocrium approbatione. Nulli enim nisi pessimi, imperitissimi et indoctissimi atque qui in desidia inertiae ex luxuria portum sua Theologia fallacissima se contulerunt, hoc facturi sunt. Ab illis morderi et vituperari, sauari atque laudari est. Caeterum si illos metuis, Ioachimum atque virtutuem et veram eruditionem ut par est, te non amasse, ijs qui te sublato superstites et veri rectius amantes erunt, confirmabis. Vtinam mihi praesto essent ea quae tu esse putas, et Iusiurandum non obstaret ne Regum quidem iras metuerem. Vides haec me subito et parum considerate atque diligenter scripsisse, Itaque ut in bonam partem accipias peto. Bene vale VI Xbris 1579.

I[ohannes] Crato.